

唐
文
粹

唐
文
粹

唐文粹卷第十五之上

詩庚

總五十九首

古調歌篇三

懷古十二

四皓詩

李白

登郭隗臺

皇甫松

鴻門醜

王穀

嚴陵釣臺下作

權德輿

故絳行

杜願

題西施浣紗石

胡幽真

懷賢十

三君詠三首

高適

陽城驛

元稹

吳興姚

鉉纂

穎陽東谿懷古

崔曙

歸沛縣道中晚泊留侯城

劉長卿

古泉驛

張說

吳中懷古

劉駕

郢城懷古

李百藥

鄴城懷古

孟雲卿

七愛詩六首

皮日休



唐文粹卷十五上

集會七

奉同徐侍郎五雲溪新亭重陽宴集作

獨孤及

高軒過

李賀

郡中與諸文士醜集

韋應物

淮南秋夜呈周偁

李嶷

夜飲東亭

宋之問

讌客辭

張籍

過賈六

蘇晉

餞送三十

送渾將軍出塞

高適

送郭大夫再使吐蕃

張說

送張舍人之江東

李白

吳興送梁補闕歸朝賦得荻花

朱長文

送周愿判官歸嶺南

姚係

送韓愈從軍

孟郊

送王昌齡赴江寧

岑參

送李十一尉臨谿

常建

奉送韋起居老舅百日假滿歸嵩陽舊居

權德輿

送從叔簡

孟郊

感別從叔簡再東歸

送弟郢東歸

盧十五竹亭送姪偁歸山

楊衡

送李觀韓愈別兼獻張徐州

孟郊

送狄宗亨

王昌齡

送孟浩然之廣陵

李白

送客

陳子昂

送唐次

武元衡

送皇甫湜赴舉

馬異

送張宗原

姚合

送綦毋潛落第還鄉

王維

送暨道士還玉清

李頎

淇上別趙仙舟

王維

送沈秀才下第東歸

賈島

崔九弟欲往南山

王維

同前

裴迪

贈別沈四逸人

高適

留別王維

翟興宗

送豆盧策歸別墅

孟郊

送柳澹入關

四皓詩

李白

白髮四老人昂藏南山側
偃卧松雪間冥翳不可識
雲窻拂青靄石壁橫翠色
龍虎方戰爭於焉自休息
秦人失金鏡漢祖昇紫極
陰虹濁太陽前星遂淪匿
一行佐明聖欵起生羽翼
功成身不居舒卷在胷臆
窅冥合元化茫昧信難測
飛聲塞天衢萬古仰遺跡

穎陽東谿懷古

崔曙

靈谿氛霧歇，皎鏡清心顏。空色不映水，秋聲多在山。世人久踈曠，萬物皆自閑。白鷺寒更浴，孤雲晴未還。昔時讓王者，此地閉玄關。無以躡高步，淒涼林壑間。

登郭隗臺

皇甫松

燕相謀在茲，積金黃巍巍。上者欲何顏，使我千載悲。

歸沛縣道中晚泊留侯城

劉長卿

訪古此城下，子房安在哉。白雲去不返，危堞空崔巍。伊昔楚漢時，頗聞經濟才。運籌風塵下，能使天地開。蔓草日已積，長松日已摧。功名滿青史，祠廟唯蒼苔。百里暮程遠，孤舟川上迴。進帆東風便，轉岸前山來。楚州澹相引，沙鷗閑不猜。扣船從此去，延首仍徘徊。

鴻門醜

王穀

寰海沸兮爭戰苦，風雲愁兮會龍虎。四百年漢欲開基，項莊一劍何虛舞。殊不知人心去暴秦，天意歸真主。項王足底踏漢土，席上

相看渾未悟

古泉驛於陵仲子宅也

張說

昔聞陵仲子守義辭三公身賃妻織屨樂亦在其中豈無窮賤苦
羞與傾巧同長白臨河上於陵入濟東我今行至此感歎石泉空

嚴子陵釣臺下作

權德輿

絕頂聳蒼翠清湍石磷磷先生晦其中天子不得臣心靈棲顛元
纓冕猶緇塵不樂禁中卧卻歸江上春潛驅東漢風日使薄者醉
焉用佐天下持此報故人則知大賢心不獨私其身弛張有深致
耕釣陶天真柰何清風後擾擾論屈伸交情同市道利欲相紛綸
我行訪遺臺仰古懷逸民矰繳鴻鵠遠雪霜松桂新江流去不窮
山色凌秋旻人世自今古清輝照無垠

吳中懷古

劉駕

勾踐飲膽日吳王酒滿盃笙歌入海雲聲自姑蘇來西施舞初罷
侍兒整金篋眾女不敢妬自比泉下泥越鼓聲騰騰吳王隔黃池

難將甬東地更學會稽棲

故絳行

杜頴

君不見銅鞮觀數里城池已蕪漫君不見祈禱宮幾重臺榭亦微
濛介馬兵車全盛時歌童舞女妖艷姿一代繁華皆共絕九原唯
望塚纍纍

郢城懷古

李百藥

客心悲莫序登墉瞰平陸林澤宵芊綿山川鬱重複王公資設險
名都距江隩方城疑北門溟海窮南服長策挫吳豕雄圖競周鹿
大蒐雲夢崦壯觀章華築人世更不競西師日侵蹙運圯屬驅馳
時屯恣敲扑莫救夷陵火無復秦庭哭鄢郢遂丘墟風塵俄慘黷
狐兔時遊踐霜露日霑沐釣渚故地平神臺層宇覆陣雲埋夏首
窮陰慘荒谷悵矣洲壑遷悲哉年祀倏雖異三春望終傷千里目

題西施浣紗石

胡幽貞

一朝入紫宮萬古遺芳塵至今溪邊花不敢嬌青春

鄴城懷古

孟雲卿

朝發淇水南將尋北燕路魏家舊城闕寥落無人住伊昔天地屯
曹公獨中據羣臣將北面白日忽西暮三臺竟寂寥萬世難長固
雄豪安在哉衰草霑霜露崔魏長河北尚見應劉墓古樹藏龍虵
荒茅伏狐兔永懷故池館數子連章句逸興驅山河雄辭變雲霧
我行覩遺跡精爽如相遇斗酒將酌君悲風白楊樹

三君詠

并序

高適

開元中適游於魏郡北有故太師鄭公舊館里中有故尚書郭公
遺業邑外又有故太守狄公生祠焉覩物增懷遂爲三君詠

魏鄭公

徵

鄭公經綸日隋氏風塵昏濟代取高位逢時敢直言道光先帝業
義激舊君恩寂寞卧龍處英靈千載魂

郭代公

元振

代公實英邁津涯浩難識權兵抗矯徵仗節歸有德縱橫負大智

顧盼安社稷流落勿重陳懷哉為悽惻

狄梁公 仁傑

梁公乃貞固勳烈垂竹帛昌言太后朝潛運儲皇策待賢開相府
其里登方伯至今青雲人猶是門下客

七愛詩 并序

皮日休

皮子之志常以真純自許每謂立大化者必有真相以房杜為真
相焉定大亂者必有真將以李太尉為真將焉做大君者必有真
隱以盧徵君為真隱焉鎮澆俗者必有真吏以元魯山為真吏焉
負逸氣者必有真放以李翰林為真放焉為名臣者必有真才以
白太傅為真才焉嗚呼吾之道時耶行其事也在乎愛忠矣不時
耶行其事也亦在乎愛忠矣苟有心歌詠者豈徒然哉

房杜二相國

吾愛房與杜貧賤其聯步脫身拋亂世策杖歸真主縱橫握中算
左右天下務骯髒無敵才磊落不世遇美矣名公卿魁然真宰輔

黃閣三十年清風一萬古巨業照國史大勳鎮王府遂使後世民
至今受陶鑄粵吾少有志敢躡前賢路苟得同其時願爲執鞭豎

李太尉晟

吾愛李太尉崛起定中原驍雄十萬兵四面圍國門一戰收三畿
一叱散妖氛乘輿旣反正克豎爭亡魂巍巍柱天功蕩蕩蓋世勳
仁於曹孟德勇過霍將軍丹劄入帑藏青史傳子孫所謂大丈夫
動合驚乾坤所謂聖天子難得忠貞臣下以契魚水上以合風雲
百世必一亂千年方一人吾雖翰墨子氣槩敢不羣願以太平頌
題向甘泉春

盧徵君鴻

吾愛盧徵君高卧嵩山裏百辟未一顧三徵方暫起坦腹對宰相
岸幘揖天子建禮門前吟金鑾殿裏醉天下皆哺糟徵君獨絮已
天下皆樂聞徵君獨洗耳天下皆懷羞徵君獨多耻銀黃不妨縣
赤紱不妨被而於心抱中獨作羲皇地籃輿一云返泥詔褒不已

再看緱山雲重酌嵩陽水放曠書裏終逍遙醉中死吾謂伊與周
不若徵君貴吾謂巢與許不若徵君義高名無階級逸迹絕涯涘
萬世唐書中逸名不可比粵吾慕真隱彊以骨肉累如教不爲名
敢有徵君志

元魯山

吾愛元紫芝清介如伯夷輦母遠之官宰邑無點疵三年魯山民
豐稔不暫飢三年魯山吏清慎各自持只飲魯山泉只採魯山薇
一室冰蘖苦四遠聲光飛退歸舊隱來斗酒入茅茨雞黍匪家畜
琴樽常自怡盡日一菜食窮年一布衣清似匣中鏡直如琴上絃
世無用賢人青山生白髭旣卧黔婁衾空立陳寔碑吾無魯山道
空有魯山辭所恨不相識援毫空涕垂

李翰林

吾愛李太白身是酒星魄口吐天上文跡作人間客礫砢千丈林
澄澈萬尋碧醉中草樂府十幅筆一息召見承明廬天子親賜食

醉曾吐御床傲幾觸天澤權臣妬逸才心如斗筭窄失恩出內署
海岳甘自適刺謁戴接離赴宴着穀屐諸侯百步迎明君九天憶
竟遭腐脅疾醉魄歸八極大鵬不可籠大椿不可摘蓬壺不可見
姑射不可識五岳爲辭鋒四溟作胷臆惜哉千萬年此俊不可得

白太傅

吾愛白樂天逸才生自然誰爲詞翰器乃是經濟賢歎從浮豔詩
作得典誥篇立身百行足爲文六藝全清望逸內署直聲驚諫垣
所刺必有思所臨必有傳忘形任詩酒寄傲遍林泉所望握文柄
所希持化權何期遇訾毀中道多左遷天下皆汲汲樂天獨怡然
天下皆悶悶樂天獨捨旃高吟辭兩掖清嘯罷三川處世似孤鶴
遺榮同蛻蟬仕若不得志可爲龜鏡焉

陽城驛

元稹

商有陽城驛名同陽道州陽公沒已久感我淚交流昔公孝父母
行與曾閔儔旣孤善兄弟兄弟和且柔一夕不相見若懷三歲憂

遂是不婚娶沒齒同衾稠妹夫死他縣遺骨無人收公令季弟往
公與仲弟留相別竟不得三人同遠遊其負他鄉骨歸來藏故丘
棲遲居下邑邑人無苟偷里中競長短來問劣與優官刑一朝耻
公短終身羞公亦不遺布人自不盜牛問公何德爾忠信先自修
發言當道理不顧黨與讎聲香漸翕習冠蓋若雲浮少者從公學
老者從公游往來相告報縣尹與君侯名落公卿口湧如波薦舟
天子得聞之書下再三求書中願一見不異旱地虬何以持爲御
駟馬駕安輶公方伯夷操事殷不事周我實唐土庶食唐之田疇
我聞天子意安敢專自由來爲諫大夫朝夕待冕旒希夷悖薄俗
密勿獻良籌神醫不言術人瘼曾暗瘳月請諫官俸諸弟相對謀
皆曰親戚外酒散目前愁公云不有爾安得此嘉猷施餘盡酤酒
客來相獻酬日旰不謀食春深仍弊裘人心良感感我樂獨油油
眞元歲云暮朝有曲如鉤風波勢奔蹙日月光綢繆齒牙屬爲猾
禾黍暗生螿豈無司言者肉食吞其喉豈無司標者利柄扼其鞴

鼻復勢氣塞不可辨薰猶公雖未顯諫惴惴如患瘤飛章八九上
皆若珠暗投炎炎日將熾積燎無人抽公乃率其屬決諫同報讎
延英殿門外扣閣仍叩頭且曰事不止臣諫誓不休上知不可遏
命以美語酬降官司成署俾之爲贅疣姦心不快活擊刺礪戈矛
終爲道州去天道意悠悠遂令不言者反以言爲訛喉舌坐成木
鷹鷂化爲鳩避權如避虎冠豸如冠猴平生附我者詩人稱好迷
私來一執手恐若墜諸溝送我不出戶決我不迴眸唯有太學生
各具糧與糒咸言公去矣我亦去荒陬公與諸生別步步駐行騶
有生不可訣行行遇閩甌爲師得如此得爲賢者不道州聞公來
鼓舞歌且謳昔公居夏邑狎人如狎鷗況自爲刺史豈復援鼓桴
滋彰一時罷教化天下道炎瘴不得老英華忽已愁有鳥哭楊震
無兒悲鄧攸唯餘門弟子列樹松與楸今來過此驛若弔汨羅洲
祠曹諱羊祜此驛何不侔我願避公諱名爲避賢郵此名有深意
蔽賢天所尤吾聞玄元教日月冥九幽幽陰蔽翳者永爲幽翳囚

奉同徐侍郎五雲谿新亭重陽宴集作 獨孤及

萬峯蒼翠色雙谿清淺流已符東山趣况值江南秋白露天地肅
黃花門館幽山公惜美景肯爲芳罇留五馬照池塘繁絃催獻酬
風前孟嘉帽乘興李膺舟騁望傲千古當歌遣四愁豈令永和人
獨擅山陰遊

高軒過

李賀

華裾織翠青如葱金環壓轡搖玲瓏馬蹄隱耳聲隆隆入門下馬
氣如虹云是東京才子文章鉅公二十八宿羅心胷元精昭昭貫
當中殿前作賦聲摩空筆補造化天無功厖眉書客感秋蓬誰知
死草生華風我今垂翅附冥鴻他日不羞虺作龍

郡中與諸文士讌集

韋應物

兵衛森畫戟宴寢凝清香海上風雨至迢遙池閣涼痾疴正消散
嘉賓復滿堂自慙居處崇未覩斯民康理會是非遣性達形迹忘
鮮肥屬時禁蔬果幸見嘗俯飲一盃酒仰聆金玉章神歡體自輕

意欲凌風翔吳中盛文史羣彥今汪洋方知大藩地豈曰才賦彊

淮南秋夜呈周偁

李嶷

天淨河漢高夜閑砧杵發清秋急如此離恨應難歇風亂池上螢
露光竹門月與君共遊處勿作他鄉別

夜飲東亭

宋之問

春水鳴大壑皓月吐層岑岑壑景色佳慰我遠遊心閨芳足幽氣
驚棲多眾音高興南山曲長謠橫素琴

讌客詞

張籍

上客不用顧金羈主人有酒君莫違請君看取園中花地上漸多
枝上稀山頭樹綠不見石谿水無風應更碧人人齊醉起舞時誰
覺翻衣與倒幘明朝花盡人已去此地獨來空繞樹

過賈六

蘇晉

主人病且閑客來情彌適一酌復一笑不知日將夕昨來屬歡遊
於今盡成昔努力持所趣空名定何益